

第六一二冊

理學彙編

學行典

孝弟部

（卷）
一四一五

古今圖書集成

中華書局影印

欽定古今圖書集成理學彙編學行典
第一百八十四卷目錄

孝弟部名賢列傳六

北魏	趙琰	長孫慮
乞伏保	孫益德	
董洛生	楊引	
閻元明	令狐仕	
皇甫奴	董吐渾	
王續生	李顯達	
吳悉達	崔承宗	
張昇	倉跋	
王崇	郭文恭	
裴修	高眞	
陸凱	姪拔寅	
李東	房景伯	
朱瓊	葉延	
北齊		
皮宿達	蕭放	
北周	荆可	
王述	皇甫遐	
秦族 弟集先	李伯貴	
張元	崔挺	
杜叔毗		
隋		
陸彥師	田德懋	
薛溶	王頌	

楊慶	郭備
田翼	紐回 子士雄
劉士偶	鄧方貴
翟普林	李德饒
華秋	徐孝肅
虞熙	李知本
田眞	梁彥光
朱昌寧	李孝子
康昕	徐孝頴
韓子誕	歐寶
王鶯	符表
蓋偶	宗元卿
鮑出	

學行典第一百八十四卷

孝弟部名賢列傳六

北魏 趙琰

按魏書孝感傳趙琰字叔起天水人父溫爲楊難當司馬初村氏亂琰爲乳母攜奔壽春年十四乃歸孝心色養既熟之節必親調之皇與中京師儉婢簡粟糶之琰遇見切責勸留輕批嘗送子應冀州聘室從者於路遇得一羊行三十里而琰知之令送於本處

又過路傍主人設羊羹琰訪知盜殺卒解不食遣人買粗刃得剩六粗即令送還刃主刃主高之義而不受琰命委之而去初爲兗州司馬轉團城鎮副將還京爲淮南王他府長史時禁制甚嚴不聽越關葬於舊兆琰積三十餘年不得葬二親及蒸嘗拜獻未會不娶慕卒事每於時節不受子孫慶賀年餘耳順而孝思彌篤慨歲月推移遷徙無期乃絕鹽粟斷諸滋味食麥而已年八十卒遷都洛陽子應等乃還鄉葬焉

長孫慮

按魏書孝感傳長孫慮代人也母因飲酒其父眞呵叱之誤以杖擊便即致死眞爲縣囚執慮以重坐慮列辭尚書云父母忿爭本無餘惡直以謬誤一朝橫禍今母喪未殯父命旦夕慮兄弟五人並各幼稚慮身居長今年十五有一女弟始向四歲更相鞠養不能保全父若就刑交墜溝壑乞以身代老父命使嬰弱衆孤得蒙存立尚書奏云慮於父爲孝子於弟爲仁兄尋究情狀特可矜感高祖詔特恕其父死罪以從遠流

乞伏保

按魏書孝感傳乞伏保高車部人也父居顯祖時爲散騎常侍領牧曹尚書賜爵寧國侯以忠謹慎密常在左右出入詔命賜官人河南宗氏亡後賜以宮人申氏宋太子左率申坦兄女也歲餘居卒申撫養伏保性嚴肅捶罵切至而伏保奉事孝謹初無恨色襲父侯爵例降爲伯稍遷左中郎將每請祿賜在外公私尺丈所用無不白知出爲無善鎮將申年餘八十

伏保手製馬輿親自扶接申欣然隨之申亡伏保解官奉喪還洛復爲長兼南中郎將卒

孫益德

按魏書孝感傳孫益德樂安人也其母爲人所害益德童幼爲母復仇還家哭於殯以待縣官高祖文明太后以其幼而孝決又不逃罪特免之

董洛生

按魏書孝感傳董洛生代人也居父喪過禮詔遣祕書中散溫紹伯奉璽書慰之令自抑割以全孝道又詔其宗親使相喻獎勿令有減性之議

楊引

按魏書孝感傳楊引鄉郡襄垣人也三歲喪父爲叔所養母年九十三卒引年七十五哀毀過禮三年服畢恨不識父追服斬衰食粥羸服誓終身命經十三年哀慕不改爲郡縣鄉閭三百餘人上狀稱美有司奏宜旌賞復其一門樹其純孝詔別勅集書標楊引至行又可假以散員之名

閻元明

按魏書孝感傳閻元明河東安邑人也少而至孝行著鄉閭太和五年除北隨郡太守元明以違離親養與言悲慕母亦慈念泣淚喪明元明悲號上訴許歸奉養一見其母母目便開刺史呂壽恩列狀上聞詔下州郡表爲孝門復其租調兵役令終母年母亡服終心喪積載每忌日悲動傍鄰昆弟雍和尊卑諸穆安貧樂道白首同歸

令狐仕

按魏書孝感傳閻元明傳荷氏縣人令狐仕兄弟四人

早喪父泣慕十載奉養其母孝著鄉邑而力田積粟博施不已

皇甫奴

按魏書孝感傳閻元明傳河東郡人楊風等七百五十人列稱樂戶皇甫奴兄弟雖沈屈兵伍而操尚彌高奉養繼親甚著恭孝之稱

董吐渾

按魏書孝感傳閻元明傳東郡小黃縣人董吐渾兄養事親至孝三世同居閭門有禮景明初畿內大使王凝奏請標異詔從之

王續生

按魏書孝感傳王續生榮陽京縣人也遭繼母憂居喪杖而後起及終禮制鬢髮盡落有司奏聞世宗詔標旌門閭甄其徭役

李顯達

按魏書孝感傳李顯達潁川陽翟人也父喪水漿不入口七日鬢髮墮落形體枯悴六年廬於墓側哭不絕聲殆於減性州牧高陽王雍以狀奏靈太后詔表其門閭

吳悉達

按魏書孝感傳吳悉達河東聞喜人也弟兄三人並幼小父母爲人所殺四時號慕悲感鄉鄰及長報仇避地末安昆弟同居四十餘載閨門和睦讓逸競勞雖於儉年糊餽不繼賓客經過必傾所有每守宰殯喪私辦車牛送終葬所鄰人孤貧窘困莫不解衣輶糧以相賑恤鄉閭五百餘人詣州稱頌焉刺史以悉達兄弟行著鄉里板贈悉達父渤海太守悉達後欲

改葬亡失墳墓推尋弗獲號哭之聲晝夜不止叫訴神祇忽於悉達足下地陷得父銘記因遷葬會祖已下三世九喪傾盡資業不假於人哀感毀梓有過初喪有司奏聞標閭復役以彰孝義

崔承宗

按魏書孝感傳吳悉達傳齊州人崔承宗其父於宋世仕漢中母喪因殯彼後青徐歸國遂爲隔絕承宗性至孝萬里投險偷路負喪還京師黃門侍郎孫惠蔚聞之曰吾於斯人見廉范之情矣於是弔贈盡禮如舊相識

張昇

按魏書孝感傳張昇榮陽人居父母喪鬢髮墜落水漿不入口吐血數升詔表門閭

倉跋

按魏書孝感傳倉跋榮陽京縣人也喪母水漿不入口五日吐血數升居喪毀瘠見稱州里有司奏聞出帝詔標門閭

王崇

按魏書孝感傳王崇字乾邑陽夏雍丘人也兄弟並以孝稱身勤稼穡以養二親仕梁州鎮南府主簿母亡杖而後起鬢髮墜落未及葬積殯宅西崇廬於殯所晝夜哭泣鳩鵲羣至有一小鳥素質黑胖形大如雀栖於崇廬朝夕不去母喪始闋復丁父憂京毀過禮是年陽夏風雹所過之處禽獸暴死草木摧折至崇田畔風雹便止禾麥十頃竟無損落及過崇地風電如初咸稱至行所感崇雖除服仍居墓側於其堂前生草一根莖葉甚茂人莫能識至冬中復有鳥巢

於崇屋乳養三子毛羽成長馴而不驚守令聞之親自臨視州以聞奏標其門閭

郭文恭

按魏書孝感傳郭文恭太原平遙人也仕爲太平縣令年踰七十父母喪亡文恭孝慕罔極乃居祖父墓次晨夕拜跪跣足負土培祖父二墓寒暑竭力積年不已見者莫不哀歎尚書聞奏標其門閭

裴修

按魏書裴駿傳駿子修字元奇清辯好學年十三補中書學生遷祕書中散轉主客令以婦父李訢事出爲張掖子都大將張掖境接邊裔前後數致寇掠修明設烽候以方略禦之在邊六年關塞清靜高祖嘉之徵爲中部令轉中大夫兼祠部曹事職主禮樂每有疑議修斟酌故實咸有條貫太和十六年卒時年五十一高祖悼惜之贈帛一百匹諡曰恭伯世宗時追贈輔國將軍東秦州刺史修早孤居喪以孝聞二弟三妹並在幼弱撫養訓誨甚有義方次弟務早喪修哀傷之感於行路愛育孤姪同於己子及將異居奴婢田宅悉推與之時人以此稱焉

高眞

按魏書高湖傳湖長子眞有志行兄弟俱至孝父亡治喪墓次甘露白雉降集焉有司以聞詔標閭里自涇州別駕稍遷安定太守著聲績卒贈龍驤將軍涇州刺史帶金城太守神龜初卒太昌元年贈使持節侍中都督定相殷三州諸軍事驃騎大將軍儀同三司定州刺史諡曰武康

陸凱

按魏書陸侯傳侯子凱字智君謹重好學年十七爲中書學生拜侍御中散轉通直散騎侍郎遷太子庶子給事黃門侍郎凱在樞要十餘年以忠厚見稱希言慶中高祖嘉之後遇患頻上書乞骸骨詔不許勅大醫給湯藥除正平太守在郡七年號爲良吏初高祖將議革變舊風大臣並有難色又每引劉芳郭祚等密與規謀共論時政而國戚謂遂疎已快快有不平之色乃令凱私喻之曰至尊但欲廣知前事直當問其古式耳終無親彼而相疏也國戚爲人意乃稍解咸陽王禧謀逆凱兄琇陷罪凱亦被收遇赦乃免凱痛兄之死哭無時節目幾失明訴冤不已備盡人事至正始初世宗復璽官爵凱大喜置酒集諸親曰吾所以數年之中抱病忍死者顧門戶計耳逝者不追今願畢矣遂以其年卒贈龍驤將軍南青州刺史諡曰惠

蛭拔寅

按魏書蛭拔寅傳勅勒部人蛭拔寅兄地干坐盜食官馬依制命死拔寅自誣己殺兄又云實非弟殺兄弟爭死辭不能定高祖詔原之

李東

按魏書李寶傳寶子佐佐子東字休賢郡辟功曹以父憂去職遂終身不食酒肉因屏居鄉里肅宗初司空任城王澄嘉其操尚以爲參軍事尋轉司徒外兵參軍歷任城濟北二郡太守孝莊初遷鎮遠將軍濟州刺史卒贈安北將軍殷中尚書相州刺史

房景伯

按魏書房法壽傳法壽族子景伯字長暉高祖謀避

地渡河居於齊州之東清河繹幕焉祖元慶仕劉駿歷七郡太守後爲沈文秀青州建威府司馬劉或之殺子業自立也子業弟子勛起兵攻之文秀遣其將劉珍之率兵助或後背或歸于子勛元慶不同爲文秀所害父愛親率勸鄉部攻文秀劉或嘉之起家授龍驤將軍尋會文秀降或乃止顯祖時三齊平隨例內徙爲平齊民以父非命疏服終身景伯生于桑乾少喪父以孝聞家貧備書自給養母甚謹尚書盧淵稱之於李冲冲時典選拔爲奉朝請司空祭酒給事中尚書儀曹郎除齊州輔國長史後遷太尉中郎司徒諮議參軍輔國將軍司空長史以母疾去官景伯性淳和涉獵經史諸弟宗之如事嚴親及弟亡蔬食終喪其不內御憂毀之容有如居重其次弟景先亡其幼弟景遠暮年哭臨亦不內寢鄉里爲之語曰有義有禮房家兄弟廷尉卿崔光詔好標勝人物無所推尚每云景伯有士大夫之行業及母亡景伯居喪不食鹽菜因此遂爲水病積年不愈孝昌三年卒於家時年五十贈左將軍齊州刺史

宋瓊

按魏書宋隱傳隱叔父洽洽子謨謨子鸞鸞弟瓊字普賢少以孝行稱母會病季秋之月思瓜不已瓊夢想見之求而遂獲時人稱異母終州郡屢辟皆不就卒於家

葉延

按魏書吐谷渾傳吐谷渾死有子六十人長子吐延身長七尺八寸勇力過人性刻暴爲昂城羌姜養聰所刺劍鎗在體呼子葉延語其大將紇拔涅曰吾氣

絕棺斂訖便速去保白蘭地既險遠又土俗懦弱易控御葉延小兒欲授餘人恐倉卒終不能相制今以葉延付汝竭股肱之力以輔之孺子得立吾無恨也抽劍而死有子十二人葉延少而勇果年十歲縛草爲人號曰姜聰每旦輒射之射中則嗶叫涕泣其母曰讎賊諸將已屠搶之汝年小何煩朝朝自苦葉延鳴咽若不自勝答母曰誠知無益然罔極之心不勝其痛性至孝母病三日不食葉延亦不食願視書傳自謂會親英洛韓始封昌黎公吾爲公孫之子案禮公孫之子得以王父字爲氏遂以吐谷渾爲氏焉

北齊

皮宿達

按北齊書皮景和傳景和少子宿達武平末太子齋帥有才藻檢行開皇中通事舍人丁母憂起復將赴京辭靈慟哭而絕久而獲蘇不能下食三日致死

蕭放

按北齊書蕭放傳放字希逸隨父祇至鄴祇卒放居喪以孝聞所居廬室前有二慈烏來集各據一樹爲巢自午以前馴庭飲啄午後更不下樹每臨時舒翅悲鳴全似哀泣家人伺之未嘗有闕時以爲至孝之感服闋襲爵武平中待詔文林館放性好文詠頗善丹青因此在宮中披覽書史及近世詩賦監畫工作屏風等雜物見知遂被眷待累遷太子中庶子散騎常侍

北周

王述

按周書王熊傳熊孫述字長述少聰敏有識度年八

歲太祖見而奇之曰王公有此孫足爲不朽即以爲鎮遠將軍拜太子舍人以祖憂去職述幼喪父爲熊所鞠養及居喪深合禮度於時東西交爭金革方始羣官遭喪者卒哭之後皆起令視事述請終禮制辭理懇切太祖命中使就視知其哀毀乃特許之喪畢襲爵扶風郡公累遷上大將軍

荆可

按周書孝義傳荆可河東猗氏人也性質朴容止有異於人能苦身勤力供養其母隨時甘旨終無匱乏及母喪水漿不入口三日悲號擗踊絕而復蘇者數載葬母之後遂廬於墓側晝夜悲哭負土成墳蓬髮不櫛沐菜食飲水而已然可家舊墓塋域極大榛蕪至深去家十餘里而可獨宿其中與禽獸雜處哀感遠近邑里稱之大統中鄉人以可孝行之至足以勸勵風俗乃上言焉太祖令州縣表異之及服終之後猶若居喪大家宰晉公護聞可孝行特引見焉與可言論時有會於護意而護亦至孝其母閭氏沒於敵境不測存亡每見可自傷久垂膝下重可至性及可卒之後護猶思其純孝收可妻子於京城恆給其衣食

秦族 第榮先

按周書孝義傳秦族上郡洛川人也祖曰父籍並有至性聞於閭里魏太和中板白頴州刺史大統中板籍郿城郡守族性至孝事親竭力爲鄉里所稱及其父喪哀毀過禮每一痛哭酸感行路既以母在恆抑割哀情以慰其母意四時珍羞未嘗匱乏與弟榮先復相友愛閨門之中怡怡如也尋而其母又沒哭泣

無時唯飲水食菜而已終喪之後猶蔬食不入房室二十許年鄉里咸歎異之其邑人王元達等七十餘人上其狀有詔表其門閭榮先亦至孝遭母喪哀慕不已遂以毀卒邑里化其孝行世宗嘉之乃下詔曰孝爲政本德乃化先旣表天經又明地義榮先居喪致疾至感過人窮號不反迄乎滅性行標當世理鏡幽明此而不顯道將何述可贈涪州刺史以旌厥異

皇甫遐

按周書孝義傳皇甫遐字末覽河東汾陰人也累世寒微而鄉里稱其和睦遐性純至少喪父事母以孝聞保定末又遭母喪乃廬於墓側負土爲墳後於墓南作一禪窟陰雨則穿窟瞻齋則營墓晚夕勤力未嘗暫停積以歲年墳高數丈周回五十餘步禪窟重臺兩匝總成十有二室中間行道可容百人遐食粥枕由櫛風沐雨形容枯槁家人不識當其營墓之初乃有鷗鳥各一徘徊悲鳴不離墓側若助遐者經月餘日乃去遠近聞其至孝競以米糲遺之遐皆受而不食悉以營佛齋焉郡縣表上其狀有詔旌異之

張元

按周書孝義傳張元字孝始河北芮城人也祖成假平陽郡守父延儒仕州郡累爲功曹主簿並以純至爲鄉里所推元性謙謹有孝行微涉經史然精修釋典年六歲其祖以夏中熱甚欲將元就井浴元固不肯從祖謂其貪戲乃以杖擊其頭曰汝何爲不肯洗浴元對曰衣以蓋形爲覆其喪元不能褻露其體於白日之下祖異而捨之南鄉有一杏樹杏熟多落元園中諸小兒競取而食之元所得者送還其主村陌

有狗子爲人所棄者元見即收而養之其叔父怒曰何用此爲將欲更棄之元對曰有生之類莫不重其性命若天生天殺自然之理今爲人所棄而死非其道也若見而不收養無仁心也是以收而養之叔父感其言遂計焉未幾乃有狗母銜一死兔置元前而去及元年十六其祖喪明三年元恆憂泣晝夜讀佛經禮拜以祈福祐後讀藥師經見言者得視之言遂請七僧然七燈七日七夜轉藥師經行道每言天人師乎元爲孫不孝使祖喪明今以燈光普施法界願祖目見明元求代聞如此經七日其夜夢見一老公以金錫治其祖目謂元曰勿憂悲也三日之後汝祖目必差元於夢中喜躍遂即驚覺乃遍告家人居三日祖果目明其後祖臥疾再周元恆隨祖所食多少衣冠不解旦夕扶持及祖歿號踊絕而復蘇復喪其父水漿不入口三日鄉里咸歎異之縣博士楊軌等二百餘人上其狀有詔表其門閭

李伯貴

按周書孝義李棠傳棠祖伯貴魏宣武時官至魯郡守有孝行居父喪哀感過禮遂以毀卒宣武嘉之贈勃海相

杜叔毗

按周書孝義傳杜叔毗字子彌其先京兆杜陵人也徙居襄陽祖乾光齊司徒右長史父漸梁邊城太守叔毗早歲而孤事母以孝聞性慷慨有志節勵精好學尤善左氏春秋仕梁爲宜豐侯蕭修府中直兵參軍大統十七年太祖令大將軍達奚武經略漢州明年武圍修於南鄭修令叔毗詣關請和太祖見而禮

之使未反而修中直兵參軍曹策參軍劉曉謀以城降武時叔毗兄君錫爲修中記室參軍從子映錄事參軍映弟斯中直兵參軍並有文武材略各領部曲數百人策等忌之懼不同己遂誣以謀叛擅加害焉修尋討策等擒之斬曉而免策及修降策至長安叔毗朝夕號泣具申冤狀朝議以事在歸附之前不可追罪叔毗內懷憤惋志在復讎然恐違朝憲坐及其母遂沈吟積時母知其意謂叔毗曰汝兄橫罹禍酷痛切骨髓若曹策朝死吾以夕歿亦所甘心汝何疑焉叔毗拜受母言愈更感勵後遂白日手刃策於京城斷首剖腹解其肢體然後面縛請就戮焉太祖嘉其志氣特命赦之尋拜都督輔國將軍中散大夫遣母憂哀毀骨立殆不勝喪服閔管公護辟爲中外府樂曹參軍加授大都督遷使持節車騎大將軍儀同三司行義歸郡守自君錫及宗室等爲曹策所害猶殯梁州至是表請迎喪歸葬高祖許之葬事所須詔令官給在梁舊田宅經外配者並追還之仍賜田二百頃尋除陝州刺史天和二年從衛國公直南討軍敗爲陳人所擒陳人將降之叔毗辭色不撓遂被害

崔挺

按北史崔挺傳挺字雙根辯之從父弟也父鬱位漢陽太守挺幼孤居喪盡禮少敦學五代同居後頻年饑家始分析挺與弟振推讓田宅舊資惟守墓田而已家徒壁立立兄弟怡然手不釋卷鄉人有贈遺挺辭而後受仍亦散之舉秀才射策高第拜中書博士轉侍郎以工書受勅於長安書文明太后父燕宣王碑賜爵泰昌子轉登聞令遷典屬國下大夫以參議律

令賜帛穀馬牛等尚書李冲甚重之孝文以挺女爲嬪宋王劉昶南鎮彭城詔挺爲長史以疾辭免乃以王肅爲長史其被遇如此後拜昭武將軍光州刺史風化大行及車駕幸兗州召挺赴行在所問以臨邊之略因及文章帝甚悅謂曰別卿以來倏焉二載吾所綴文以成一集今當給卿副本顧謂侍臣曰擁旄者皆如此何憂哉復還州及散騎常侍張彝巡行風俗謂曰彝受使巡方探察諸訟入境觀政實愧清使之名州舊被城西北數里有斧山峻嶺高峻北臨滄海南望岱岳挺於頂上欲營觀宇故老曰此嶺上秋夏之際常有暴雨相傳云是龍道恐此觀不可久立挺曰人龍相去何遠之有蚪龍儼忽豈一路乎遂營之數年間果無風雨之異挺既代卽爲風雨所毀遂莫能立衆以爲善化所感挺歷官三十餘年家資不益食不重味室無綺羅閨門之內雍雍如也欲諸子恭敬廉讓因以孝爲字及葬親故多有贈賵諸子推挺素志一無所受有子六

隋

陸彥師

按隋書孝義傳陸彥師字雲房魏郡臨漳人祖希道魏定州刺史父子彰中書監彥師少有行檢爲邦族所稱長而好學解屬文魏襄城王元旭引爲參軍事以父艱去職哀毀殆不勝喪與兄卬廬於墓次負土成墳公卿重之多就墓側存問晦朔之際車馬不絕齊文宣聞而嘉歎旌表其閭號其所住爲孝終里中書令河間邢邵表薦之未報彭城王浟爲司州牧召補主簿後歷中外府東閣祭酒兄卬當襲父始平侯

以彥師昆弟中最幼表讓封焉彥師固辭而止時稱友悌孝義總萃一門遷中書舍人尋轉通直散騎侍郎每陳使至必令高選主客彥師所接對者前後六輩歷中書黃門侍郎以不阿宦者遇議出爲中山太守有惠政數年徵爲吏部郎中周武平齊授彥師下大夫宣帝時轉少納言賜爵臨水縣男奉使幽薊俄而高祖爲丞相彥師遇疾請假還鄴尉迴將爲亂彥師微知之遂委妻子潛歸長安高祖嘉之授內史下大夫拜上儀同高祖受禪拜尚書左丞進爵爲子彥師素多病未幾以務劇病動乞解所職有詔聽以本官就第歲餘轉吏部侍郎隋承周制官無清濁彥師在職凡所任人頗甄別於士庶論者美之後復以病出爲汾州刺史卒官

田德懋

按隋書孝義傳田德懋觀國公仁恭之子也少以孝友著名開皇初以父軍功賜爵平原郡公授太子千牛備身丁父艱哀毀骨立廬於墓側負土成墳上聞而嘉之遣員外散騎侍郎元志就弔焉復降聖書曰皇帝謝田德懋知在窮疾哀毀過禮倚廬墓所負土成墳朕孝理天下思弘名教復與汝通家情義素重有聞孝感嘉歎兼深春日暄和氣力何似宜自抑割以禮自存也并賜練二百匹米百石復下詔表其門閭後歷太子舍人義州司馬大業中爲給事郎尚書駕部郎卒官

薛溶

按隋書孝義傳薛溶字道頤刑部尚書內陽公曹之從祖弟也父瑛周渭南太守溶少喪父早孤養母以

孝聞幼好學有志行尋師於長安時初平江陵何妥歸國見而異之授以經業周天和中襲爵虞城侯歷納言上士新豐令開皇初擢拜尚書虞部侍郎尋轉考功侍郎帝聞溶事母至孝以其母老賜與服几杖四時珍味當時榮之後其母疾溶親甚憂瘁親故弗之識也暨丁母艱詔鴻臚監護喪事歸葬夏陽於時隆冬極寒溶衰絰徒跣冒犯霜雪自京及鄉五百餘里足凍墮指瘡血流離朝野爲之傷痛州里賙助一無所受尋起令視事溶屢陳誠款請終喪制優詔不許及至京上見其毀瘠過甚爲之改容顧謂羣臣曰吾見薛溶哀毀不覺悲感傷懷嗟異久之溶竟不勝喪病且卒其弟諱時爲晉王府兵曹參軍事在揚州溶遺書與諱曰吾以不造幼丁艱酷窮遊約處屢絕單瓢晚生早孤不聞詩禮賴奉先人貽厥之訓獲稟母氏聖善之規負笈裘糧不憚艱遠從師就業欲罷不能砥行勵心困而彌篤服膺教義爰至長成自釋未登朝於茲二十三年矣雖官非開達而祿喜逮親庶保期頤得終色養何圖精誠無感禍酷薦臻兄弟俱被奪情苦虛靡申哀訴是用扣心泣血實氣摧魂者也既而瘡巨豐深不勝荼毒啓手啓足幸及全歸使夫死而有知得從先人於地下矣豈非至願哉但念爾伶俜孤宦遠在邊服顧此恨恨如何可言適已有書冀得與汝面訣忍死待汝已歷一句汝既未來便成今古緬然永別爲恨何言勉之哉勉之哉書成時年四十二有司以聞高祖爲之屑涕降使齋開書弔祭曰皇帝咨故考功侍郎薛溶於戲惟尔操履貞和器業詳敏允膺列宿勤勞克彰及違私艱奄從毀

滅嘉示誠孝感於朕懷寔有抑抑惟朝典故遣使人指申往命魂而有靈歆茲榮渥嗚呼哀哉溶性清儉死之日家無遺資溶初爲童兒時與宗中諸兒遊戲於澗濱見一黃蛇有角及足召羣兒共視了無見者溶以爲不祥歸大憂悴母逼而問之溶以實對時有胡僧詣宅乞食溶母怖而告之僧曰此乃兒之吉應且是兒也早有名位然壽不過六七耳言終而出忽然不見時咸異之既而終於四十二六七之言於是驗矣

王頒

按隋書孝義傳王頒字景彥太原祁人也祖神念梁左衛將軍父僧辯太尉頒少儻有文武幹局其父平侯景雷頒質於荊州遇元帝爲周師所陷頒因入關聞其父爲陳武帝所殺號慟而絕食頃乃蘇哭泣不絕聲毀瘠骨立至服闋常布衣蔬食藉藥而臥周明帝嘉之召授左侍上士累遷漢中太守尋拜儀同三司開皇初以平蠻功加開府封蛇丘縣公獻取陳之策上覽而異之召與相見言畢而獻欬上爲之改容及大舉伐陳頒自請行率徒數百人從韓擒先鋒夜濟力戰被傷恐不堪復鬪悲感嗚咽夜中因睡夢有人授藥比寤而瘡不痛時人以爲孝感及陳滅頒密召父時士卒得千餘人對之涕泣其間將士或問頒曰郎君來破陳國滅其社稷雖恥已雪而悲哀不止者將爲霸先早死不得手刃之邪請發其丘壟斲櫬焚骨亦可申孝心矣頒頓顙陳謝額盡流血答之曰其爲帝王墳塋甚大恐一宵發掘不及其屍更至明朝事乃彰露若之何諸人請具鑿鋪一旦皆萃於

是夜發其陵剖棺見陳武帝髮並不落其本皆出自骨中頡達焚骨取灰投水而飲之既而自縛歸罪於晉王王表其狀高祖曰朕以義平陳王頡所為亦孝義之道也朕何可罪之舍而不問有司錄其戰功將加柱國賜物五千段頡固辭曰臣緣國威靈得雪怨恥本心徇私非是為國所加官賞終不敢當高祖從之拜代州刺史甚有惠政母憂去職後為齊州刺史卒官時年五十二

楊慶

按隋書孝義傳楊慶字伯悅河間人也祖元父剛並以至孝知名慶美姿儀性辯慧年十六齊國子博士徐遵明見而異之及長頗涉書記年二十五郡察孝廉以侍養不行其母有疾不解襟帶者七旬及居母憂哀毀骨立負土成墳齊文宣帝表其門閭賜帛三十匹綿十屯粟五十石高祖受禪屢加褒賞擢授儀同三司版授平陽太守年八十五終於家

郭儁

按隋書孝義傳郭儁字弘父太原文水人也家門雍睦七葉共居大禾同乳烏鵲通巢時人以為義感之應州縣上其事上遣平昌公宇文弼詣其家勞問之治書御史柳或巡省河北表其門閭漢王諒為并州總管聞而嘉歎賜兄弟二十餘人衣各一襲

田翼

按隋書孝義傳田翼不知何許人也性至孝養母以孝聞其後母臥疾歲餘翼親易燥濕母食則食母不食則不食母患暴痢翼謂中毒遂親嘗惡及母終翼一慟而絕其妻亦不勝哀而死鄉人共厚葬之

紐回子士雄

按隋書孝義傳紐回字孝政河東安邑人也性至孝周武成中父母喪廬於墓側負土成墳廬前生麻一株高丈許圍之合拱枝葉鬱茂冬夏恆青有烏棲其上回舉聲哭鳥即悲鳴時人異之周武帝表其閭擢授甘棠令開皇初卒子士雄少質直孝友喪父復廬於墓側負土成墳其庭前有一槐樹先甚鬱茂及士雄居喪樹遂枯死服闋還宅死槐復榮高祖聞之歎其父子至孝下詔褒揚號其所居為累德里

劉士儔

按隋書孝義傳劉士儔彭城人也性至孝丁母喪絕而復蘇者數矣勺飲不入口者七日廬於墓側負土成墳列植松柏孤狼馴擾為之取食高祖受禪表其門閭

耶方貴

按隋書孝義傳耶方貴淮南人也少有志尚與從父弟雙貴同居開皇中方貴嘗因出行遇雨淮水汎長於津所寄渡船人怒之過方貴臂折至家其弟雙貴驚問所由方貴具言之雙貴悲恨遂向津毆擊船人致死守津者執送之縣官案問其狀以方貴為首當死雙貴從坐當流兄弟二人爭為首坐縣司不能斷送詣州兄弟各引咎州不能定二人爭欲赴水而死州狀以聞上聞而異之特原其罪表其門閭賜物百段後為州主簿

翟普林

按隋書孝義傳翟普林楚丘人也性仁孝事親以孝聞州郡辟命皆固辭不就躬耕色養鄉鄰謂為楚丘

先生後父母疾親易燥濕不解衣者七旬大業初父母俱終哀毀殆將滅性廬於墓側負土為墳盛冬不衣繪絮唯著單縗而已家有一烏犬隨其在墓若普林哀臨大亦悲號見者嗟異焉有二鵲巢其廬前柏樹每入其廬馴狎無所驚懼大業中司隸巡察奏其孝感擢授孝陽令

李德饒

按隋書孝義傳李德饒趙郡柏人人也祖徹魏尚書右丞父純開皇中為介州長史德饒少聰敏好學有至性宗黨咸敬之弱冠為校書郎仍直內史省參掌文翰轉監察御史糾正不避貴戚大業三年還司隸從事每巡四方理雪冤枉褒揚孝悌雖位秩未通其德行為當時所重凡與交結皆海內髦彥性至孝父母寢疾輒終日不食十旬不解衣及丁憂水漿不入口五日哀慟嘔血數升及送葬之日會仲冬積雪行四十餘里單縗徒跣號踴幾絕會葬者千餘人莫不為之流涕後甘露降於庭樹有鵲巢其廬納言楊達巡省河北詣其廬弔慰之因改所居村名孝敬村里為和順里後為金河長未之官值羣盜蜂起賊帥格謙孫宣雅等十餘頭聚眾於渤海時有勅許其歸首謙等懼不敢降以德饒信行有聞遣使奏曰若使德饒來者即相率歸首帝於是遣德饒往渤海慰諭諸賊行至冠氏會他盜攻陷縣城德饒見害其弟德佑性重然諾大業末為離石郡司法書佐太守楊子崇特禮之及義兵起子崇遇害棄尸城下德佑赴哭盡哀收瘞之至介休詣義師請葬子崇大將軍嘉之因贈子崇官令德佑為使者往離石禮葬子崇焉

華秋

按隋書孝義傳華秋汲郡臨河人也幼喪父事母以孝聞家貧備賃為養其母遇患秋容貌毀悴鬚鬢頓改州里咸嗟異之及母終之後遂絕櫛沐髮盡禿落廬於墓側負土成墳有人欲助之者秋輒拜而止之大業初調狐皮郡縣大獵有一兔入逐之奔入秋廬中匿秋膝下獵人至廬所異而免之自爾此兔常宿廬中馴其左右郡縣嘉其孝感具以狀聞煬帝降使勞問表其門閭後羣盜起常往來廬之左右咸相誡曰勿犯孝子鄉人賴秋而全者甚衆

徐孝肅

按隋史孝義傳徐孝肅汲郡人也宗族數千家多以豪俊相尚唯孝肅性儉約事親以孝聞雖在幼齒宗黨間每有爭訟皆至孝肅所平論之為孝肅所短者無不引咎而退孝肅早孤不識父及長問其母父狀因求畫工圖其形像構廟置之而定省焉朔望享祭養母至孝數十年家人未見其有忿恚之色及母老疾孝肅親易燥濕憂悴數年見者無不悲悼母終孝肅茹蔬飲水盛冬單紱毀瘠骨立祖父母父母墓皆負土成墳廬於墓所四十餘載被髮徒跣遂以身終其弟德備聰敏通涉五經河朔間稱為儒者德備終子處默又廬於墓側奕葉稱孝焉

虞熙

按隋書虞世基傳世基長子肅好學多材藝時人稱有家風弱冠早歿肅弟熙大業末為符璽郎次子柔晦並宣義郎化及將亂之父宗人虞侯知而告熙曰事勢已然吾將濟卿南度且得免禍同死何益熙謂

伋曰棄父背君求生何地感尊之懷自此訣矣及難作兄弟競請先死行刑人於是先世基殺之

李知本

按畿輔通志李知本元氏人涉獵經史事親篤至兄雍順子孫百數庭無間言大業末盜賊過閭不入且相戒曰無犯義門往依者五百餘室

田真

按陝西通志田真醴泉人兄弟三人田廣田慶皆同財產及各娶妻諸婦遂求分異堂前有一紫荆樹甚茂兄弟共議破而為三株忽一夕樹即枯死真見之驚謂弟曰木本同株當分根便憔悴况人兄弟孔懷而可離是人不如樹木也兄弟感而更合諸婦聞之復無間言

梁彥光

按陝西通志梁彥光字修之涇州人七歲父顯周篤疾醫云餌紫英石可愈彥光憂悴忽於園中見一物持歸即紫英石也人謂至孝所感

朱昌寧

按歸德府志朱昌寧宋城人有孝行母病思瓜時四月瓜未熟昌寧於瓜田中號泣一夕瓜熟昌寧取以奉母母食之病遂愈開皇中有司上其事詔旌之

李孝子

按吉安府志李孝子失其名吉水人隋大業中幼喪母哀毀踰禮事父孝養不懈每出不踰里輒返曰老親在顧可移時忘膝下乎父病連旬襟帶不解逮歿未葬比舍失火火驟至遂慟哭伏棺死墓在學宮側有司世世表而封之

康昕

按吉安府志康昕本姓匡廬陵人性至孝隱金華山不與俗交母時病亡昕奔還號叫母即甦人以為孝感所致

徐孝穎

按吳縣志徐孝穎祖驎梁侍中石陽侯父樞陳尚書起部郎孝穎勤學多覽善屬文性至孝丁母憂三年哀經不離身經冬不御綿纈形體骨立每哭臨哀聲徹郡邑聞者隕涕常在園中晝臥見人盜菜徐轉身向裏恐盜見之仕煬帝為學士校書郎

韓子誕

按太原府志韓子誕文水人親沒負土築墳居喪盡禮朝廷旌嘉及卒視其脊骨皆毀大業末表其門閭唐貞觀中燭其賦役

歐寶

按吉安府志歐寶永豐人性至孝父喪廬墓里人格虎虎投其廬中寶以衣覆之里人問寶寶曰虎顧可舍藏耶虎竟得脫渡江去其後虎致鹿助寶祭人以為寶孝能格猛獸云

王鷲

按吉安府志王鷲石陽人喪父權厝宅後宅火煙燄盛力不能撲投火死鄉人哀其捐身為孝也共墓葬之因祠焉

符表

按吉安府志符表符朗兄子也從父徙安成年十六母姜氏有疾晝夜省侍母日一食表亦一食母不食表亦不食竟以不食死俄母亦歿俱葬於四望岡太

守爲表其墓

蓋偶

按兗州府志蓋偶魯郡人也六世同居並共財產家門雍睦鄉里敬異有司申奏表其門閭

宗元卿

按南陽府志宗元卿字希蔣南陽人有至行早孤爲祖母所養祖母病元卿在遠輒心痛大病則大痛小病則小痛以此爲常鄉里宗事之號宗會子

鮑出

按陝西通志鮑出字文才京兆新豐人少遊俠適遭時亂出與母兄弟五人又遇大侵留母守舍兄弟同採蓬實供母及歸母已被賊掠去兄弟皆莫敢前出獨攘臂結衽追至賊所負母而歸又有鄰嫗遙望哀求出更救嫗時客南陽侯關中平出以籠箠載母還里中士大夫嘉其孝烈薦之郡郡辟之出曰田民不堪冠帶固辭不受後母百餘歲卒出時年七十餘歲行喪如禮

欽定古今圖書集成理學彙編學行典

第一百八十五卷目錄

孝弟部名賢列傳七

唐一

李知本

劉君良

任敬臣

王遇

武弘度

鄭潛曜

裴敬彝

沈季詮

陳集原

張琇

趙師舉

徐元慶

梁悅

許法慎

程俱羅

李興

陳饒奴

萬敬儒

楊半

畢構

李迴秀

賈會

張志寬

王少元

支叔才

程袁師

宋思禮

元讓

梁文貞

許伯會

陸南金

王君操

同歸智壽

余常安

康買得

侯知道

何澄粹

林攢

王博武

章全益

李源

殷亮

李行芳

陸景融

劉敦儒

杜羔

賈直言

宋興貴

許坦

崔沔

羅讓

崔衍

杜式方

李日知

張公藝

趙弘智

丁公著

呂元簡

裴守貞

學行典第一百八十五卷

孝弟部名賢列傳七

唐一

李知本

按唐書孝友傳李知本趙州元氏人元魏洛州刺史靈六世孫父孝端仕隋爲獲嘉丞與族弟太冲俱有世閥而太冲官婚最高鄉人語曰太冲無兄孝端無弟知本涉經術事親篤至與弟知隱雍順子孫百餘至貴用僮僕無閒也大業末盜賊過闔不入相戒曰無犯義門往依者五百餘室皆以免貞觀初知隱爲伊闕丞知本夏津令開元中孫瑱爲給事中揚州長史知隱孫頤有文辭至太常少卿從祖兄弟位給事中凡四人

張志寬

按唐書孝友傳張志寬蒲州安邑人居父喪而毀州里稱之王君廓兵略地不暴其閭倚全者百許姓後爲里正忽詣縣稱母疾求急令問狀對曰母有疾志寬輒病是以知之令謂其妄繫於獄馳驗如言乃慰

遣之母終負土成墳手時松柏高祖遣使者就弔拜員外散騎常侍賜物四十段表其閭

劉君良

按唐書孝友傳劉君良瀛州饒陽人四世同居族兄弟猶同產也門內斗粟尺帛無所私隋大業末荒饑妻勸其異居因易置庭樹鳥雛令鬪且鳴家人怪之妻曰天下亂禽鳥不相容况人耶君良即與兄弟別處月餘密知其計因斥去妻曰爾破吾家召兄弟流涕以告更復同居天下亂鄉人共依之衆築爲堡因號義成堡武德中深州別駕楊弘業至其居凡六院共一庖子弟皆有禮節歎挹而去貞觀六年表異門閭

王少元

按唐書孝友傳王少元博州聊城人父隋末死亂兵遺腹生少元甫十歲問父所在母以告卽哀泣求尸時野中白骨覆壓或曰以子血漬而滲者父齒也少元鑿膚開旬而獲遂以葬創甚彌年乃與貞觀中州言狀拜徐王府參軍

任敬臣

按唐書孝友傳任敬臣字希古棣州人五歲喪母哀毀天至七歲問父英曰若何可以報母英曰揚名顯親可也乃刻志從學汝南任處權見其文驚曰孔子稱顏回之賢以爲弗如也吾非古人然見此兒信不可及十六刺史崔樞欲舉秀才自以學未廣遁去又三年卒業舉孝廉授著作局正字父亡數殯絕繼母曰而不勝喪謂孝可乎敬臣更進膳粥服除遷祕書郎休沐闔門誦書監處世南器其人歲終書上考固

辭召爲弘文館學士俄授越王府西閣祭酒當代王再表留進朝請即舉制科擢許王文學復爲弘文館學士終太子舍人

支叔才

按唐書孝友傳支叔才定州人隋末荒饑夜丐食野中還進母爲賊執欲殺之告以情賊閱其孝爲解縛母病癰叔才吮瘡注藥及亡廬墓有白鶴止廬傍高宗時表異其家

王遇

按唐書孝友支叔才傳至德間有常州人王遇弟遐俱爲賊執將釋一人兄弟相讓死賊感其意盡縱之

程袁師

按唐書孝友傳程袁師宋州人母病十旬不輟帶藥不嘗不進代弟戍洛州母終聞訃日走二百里因負土築墳號耀人不復識改葬會門以來閱二十年乃畢常有白狼黃蛇馴墓左每哭羣鳥鳴翔永徽中刺史狀諸朝詔吏敦駕既至不顧仕授儒林郎還之

武弘度

按唐書孝友傳武弘度士讓兄之子補相州司兵參軍永徽中父卒自徐州被髮徒跣趨喪所負土築塋晨夕號日一溢米素乏產廬前狸授其旁高宗下詔褒美旌其門

宋思禮

按唐書孝友傳宋思禮字過庭事繼母徐爲聞孝補蕭縣主簿會大旱井池涸母羸疾非泉水不適口思禮憂懼且禱忽有泉出諸庭味甘寒日不乏汲縣人異之尉柳晃爲刻石頌其孝感

鄧潛曜

按唐書孝友傳鄧潛曜者父萬鈞駙馬都尉榮陽郡公母代國長公主開元中主寢疾潛曜侍左右造次不去累三月不顧面主疾侵刺血爲書請諸神丐以身代火書而神許二字獨不化翌日主愈戒左右無敢言後尚臨晉長公主歷太僕光祿卿

元讓

按唐書孝友傳元讓雍州武功人擢明經以母病不肯調侍膳不出閤數十年母終廬墓次廢櫛沐飯菜飲水咸亨中太子監國下令表闕於門永淳初巡察使表讓孝悌卓越擢太子右內率府長史歲滿還鄉里人有所訟皆詣讓判中宗在東宮召拜司議郎入謁武后望謂曰卿孝於家必能忠於國宜以治道輔吾子尋卒

裴敬彝

按唐書孝友傳裴敬彝絳州聞喜人會祖子通隋開皇中以大中大夫居母喪哀哭喪明有白鳥巢槿兄弟八人皆爲名孝詔表門闕世謂義門裴氏敬彝七歲能文章性謹敬宗族重之號甘露頂父智周補臨黃令爲下所訟敬彝年十四詣巡察使唐臨直枉臨奇之試命作賦賦工父罪已釋表敬彝於朝補陳王府典籤一日忽涕泣謂左右曰大人病痛吾輒然今心悸而痛事叵測乃請急倍道歸而父已卒羸毀踰禮乾封初累遷監察御史母病醫許仁則者辭不能乘敬彝自爲輿往迎既居喪詔贈緘帛官爲作靈輦終服以著作郎兼修國史歷中書舍人太子左庶子武后時爲酷吏所陷死嶺南

梁文貞

按唐書孝友傳梁文貞號州閭鄉人少從軍守邊還親已亡自傷不得養即穿墻爲門晨夕汛掃廬墓左暗默三十年家人有所問畫文以對會官改新道出文貞廬前行旅見之皆爲流涕有甘露降坐木白兔馴擾縣令刊石記之開元中刺史許景先表文貞孝絕倫類詔付史官

沈季詮

按唐書孝友傳沈季詮字子平洪州豫章人少孤事母孝未嘗與人爭皆以爲怯季詮曰吾怯乎爲人子者可遺憂於親乎哉貞觀中侍母渡江遇暴風母溺死季詮號呼投江中少選持母臂浮出水上都督謝叔方具禮祭而葬之

許伯會

按唐書孝友傳許伯會越州蕭山人或曰元度十二世孫舉孝廉上元中爲衡陽博士母喪負土成墳不御絮帛嘗滋味野火將逮塋樹悲號於天俄而雨火滅歲旱泉湧廬前靈芝生

陳集原

按唐書孝友傳陳集原瀧州開陽人世爲酋長父龍樹爲欽州刺史有疾即集原輒不食及亡嘔血數升即塋作廬盡以田貲讓兄弟里人高之武后時歷右豹韜衛大將軍

陸南金

按唐書孝友傳陸南金蘇州吳人祖士季從同郡顧野王學左氏春秋司馬史氏漢書仕隋爲越王侗記室兼侍讀稱制擢著作郎時王世充將篡逆侗

謂士季曰隋有天下三十年朝果無忠臣乎士季對曰見危授命臣宿志也請因啓事爲陛下殺之謀洩停侍讀乃不克貞觀初終太學博士兼弘文館學士南金仕爲太常奉禮郎開元初少卿盧崇道抵罪徙嶺南逃還東都南金居母喪崇道爲稱中客人而道其情南金匿之俄爲讎人跡告詔侍御史王旭捕按南金當重法弟趙璧詣旭自言匿崇道者我也請死南金固言弟自誣不情旭怪之趙璧曰母未葬妹未歸兄能辦之我生無益不如死旭驚上狀元宗皆宥之南金知書史履操謹完張說陸象先以賢謂之由庫部員外以痼疾改太子洗馬卒

張琇

按唐書孝友傳張琇河中解人父審素爲嶺州都督有陳纂仁者誣其冒職殺私庸兵元宗疑之詔監察御史楊汪即按纂仁復告審素與總管董堂禮謀反於是汪收審素繫雅州獄馳至嶺州按反狀堂禮不勝忿殺纂仁以兵七百圍汪脇使露章雪審素罪既而吏共斬堂禮汪得出遂當審素實反斬之沒其家琇與兄理尚幼徙嶺南久之逃還汪更名萬頃時年十三琇少二歲夜狙萬頃於魏王池墮斫其馬萬頃驚不及鬪爲琇所殺條所以殺萬頃狀繫於斧奔江南將殺構父罪者然後詣有司道汜水吏捕以聞中書令張九齡等皆稱其孝烈宜貸死待中裴耀卿等陳不可帝亦喟然謂九齡曰孝子者義不顧命殺之可成其志赦之則虧律凡爲子孰不願孝轉相讎殺遂無已時卒用耀卿議議者以爲寬帝下詔申論乃殺之臨刑賜食理不能進琇色自如曰下見先人

復何恨人莫不閔之爲謀揭於道斂錢爲葬北邙尚恐仇人發之作疑塚使不知其處

王君操

按唐書孝友張琇傳太宗時有卽墨人王君操父隋末爲鄉人李君則所殺亡命去時君操尚幼至貞觀時朝世更易而君操寡孤仇家無所憚詣州自言君操密挾刃殺之剔其心肝噉立盡趨告刺史曰父死凶手歷二十年不克報乃今刷憤願歸死有司州上狀帝爲貸死

趙師舉

按唐書孝友張琇傳高宗時絳州人趙師舉父爲人殺師舉幼母改嫁仇家不疑師舉長爲人傭夜讀書久之手殺讎人詣官自陳帝原之

同歸智壽

按唐書孝友張琇傳永徽初同官人同歸智壽父爲族人所害智壽與弟智爽候諸塗擊殺之相率歸有司爭爲首有司不能決者三年或言弟始謀乃論死臨刑曰讎已報死不恨智壽自投地委頓身無完膚祇智爽血盡乃已見者傷之

徐元慶

按唐書孝友張琇傳武后時下邳人徐元慶父爽爲縣尉趙師韞所殺元慶變姓名爲驛家保久之師韞以御史舍亭下元慶手殺之自因詣官后欲赦死左拾遺陳子昂議曰先王立禮以進人明罰以齊政枕戈讎敵人之義也詎罪禁亂王政綱也然無義不可訓人亂綱不可明法聖人修禮治內飭法防外使守法者不以禮廢刑居禮者不以法傷義然後暴亂銷

廉恥興天下所以直道而行也元慶報父讎求身歸罪雖古烈士何以加然殺人者死畫一之制也法不可二元慶宜伏辜傳曰父讎不同天勸人之教也教之不苟元慶宜赦臣聞刑所以生遏亂也仁所以利崇德也今報父之讎非亂也行子之道仁也仁而無利與同亂誅是曰能刑未可以訓然則邪由正生治必亂作故禮防不勝先王以制刑也今義元慶之節則廢刑也跡元慶所以能義動天下以其忘生而趨其德也若釋罪以利其生是奪其德虧其義非所謂殺身成仁全死忘生之節臣謂宜正國典寬之以刑然後旌閭墓可也時趙師舉言後禮部員外郎柳宗元駁曰禮之大本以防亂也若曰無爲賊虐凡爲子者殺無赦刑之大本亦以防亂也若曰無爲賊虐凡爲治者殺無赦其本則合其用則異旌與誅不得並也誅其可旌茲謂濫刑甚矣旌其可誅茲謂僭禮甚矣若師韞獨以私怨奮吏氣虐非辜州牧不知罪刑官不知問上下蒙冒顧號不聞而元慶能處心積慮以衝讎人之胷介然自克卽死無憾是守禮而行義也執事者宜有慙色將謝之不暇而又何誅焉其或父不免於罪師韞之誅不愆於法是非死於吏也是死於法也法其可讎乎讎天子之法而戕奉法之吏是悖驚而凌上也執而誅之所以正邦典而又何旌焉禮之所謂讎者冤抑沈痛而號無告也非謂抵罪觸法陷於大戮而曰彼殺之我乃殺之不議曲直暴寡脅弱而已春秋傳曰父不受誅子復讎可也父受誅子復讎此推刃之道復讎不除害今若取此以斷兩下相殺則合於禮矣且夫不忘讎孝也不愛死

義也元慶能不越於禮服孝死義是必達禮而聞道者也夫達禮聞道之人豈其以王法為敵讎者哉議者反以為數顯刑壞禮其不可以為典明矣請下臣議附於今有斷斯獄者不宜以前議從事

余常安

按唐書孝友張琇傳憲宗時衢州人余常安父叔皆為里人謝全所殺常安八歲已能謀復讎十有七年卒殺全刺史元錫奏輕比刑部尚書李鄠執不可卒抵死

梁悅

按唐書孝友張琇傳富平人梁悅父為秦果所殺悅殺讎詣縣請罪詔曰在禮父讎不同天而法殺人必死禮法王教大端也二說異焉下尚書省議職方員外郎韓愈曰子復父讎見于春秋於禮記周官君子史不勝數未有非而罪者最宜詳於律而律無條非闕文也蓋以為不許復讎則傷孝子之心許復讎則人將倚法顯殺無以禁止夫律雖本於聖人然執而行之者有司也經之所明者制有司者也丁寧其義於經而深沒其文於律者將使法吏一斷於法而經術之士得引經以議也周官曰凡殺人而義者令勿讎讎之則死義者宜也明殺人而不得其宜者子得復讎也此百姓之相讎者也公羊子曰父不受誅子復讎可也不受誅者罪不當誅也誅者上施下之辭非百姓相殺也周官曰凡執仇讎者書於士殺之無罪言將復讎必先言於官則無罪也復讎之名雖同而其事各異或百姓相讎如周官所稱可議於今者或為官吏所誅如公羊所稱不可行於今者周官所

稱將復讎先告於士若孤稚羸弱抱微志而何敵人之便恐不能自言未可以為斷於今也然則殺之與赦不可一宜定其制曰有復父讎者事發具其事下尚書省集議以聞酌處之則經無失指矣有詔以悅申冤請罪詣公門流循州

康買得

按唐書孝友張琇傳穆宗世京兆人康買得年十四父憲責錢於雲陽張荏荏醉拉憲危死買得以荏趙悍度救不足解則舉錡擊其首三日荏死刑部侍郎孫革建言買得救父難不為暴度不解而擊不為凶先王制刑必先父子之親春秋原心定罪周書諸罰有權買得孝性天至宜賜於有有詔減死

許法慎

按唐書孝友傳許法慎滄州清池人甫三歲已有知時母病不飲乳慘慘有憂色或以珍饈悅之輒不食還以進母後親喪常廬於坐有甘露嘉禾靈芝木連理白兔之祥天寶中表異其間

侯知道 程俱羅

按唐書孝友傳侯知道程俱羅者靈州靈武人居親喪穿墻作冢皆身執其勞鄉人助者即哭而卻之廬墳次哭泣無節知道七年俱羅三年不止知道垢塵積首率夜半傳墳踊而哭鳥獸為悲號李華作二孝贊表其行曰厥初生人有君有親孝親為子忠君為臣兆自天命降及人倫背死不義忘生不仁過及智就為之禮文至哉侯氏創巨痛殷手足胼胝以成高墳夜黑颺動如隨鬼神哭無常聲迴徹蒼旻其斬三年爾獨終身嗟嗟程生其哀也均顧後絕配瞻前無

郝

何澄粹

按唐書孝友侯知道程俱羅傳何澄粹者池州人親病日錮俗尚鬼病者不進藥澄粹剔股肉進親疾為瘳後親沒伏於墓哭踊無數以毀卒當時號青陽孝子士為作誄甚衆

李興

按唐書孝友侯知道程俱羅傳壽州安豐李興亦有至行柳宗元為作孝門銘曰壽州刺史臣承思言九月丁亥安豐令上所部編戶毗典父被惡疾歲月就亟典自刃股肉假託饋獻父老病已不能啖宿而死興號呼撫臆口鼻垂血捧土就墳沾漬涕洟墳左作小廬蒙以苫茨伏匿其中扶服頓踊晝夜哭訴孝誠幽達神為見異廬上產紫芝白芝廬中醴泉湧此皆陛下孝治神化陰中其心而克致斯事謹按典匹庶賤陋循習淺下性非文字所導生與耨耨未為業而能鍾彼醇孝超出古烈天意神道猶錫瑞物以表殊異伏惟陛下有唐堯如神之德宜加旌褒合於上下請表其里閭刻石明白宣延風美觀示後祀永永無極臣昧死請制曰可銘曰懿厥孝思茲惟淑靈稟承粹和篤守天經泣侍羸疾狀禱禱冥冥刃自向殘肌敗形羞膳奉進憂勞孝誠惟時高會不視聽創巨痛仍號於穹旻捧土濡涕頓首成墳指膺腐背寒暑在廬草木悴死鳥獸踟躕殊類異族亦相其哀肇有二位孝道爰興克修厥猷載籍是登在帝有虞以孝烝絜仲尼述經以教於世惟昔魯侯命夷宮亦有考叔廬莊稱純顯顯李氏實與之倫哀嗟道路涕慕里

鄰神錫祉三秀靈泉帝命薦加亦表其門統一上下交贊天人建此碑號億齡揚芬

林攢

按唐書孝友傳林攢泉州莆田人貞元初仕爲福唐尉母羸老未及迎而病攢聞棄官還及母亡水漿不入口五日自挺甕作塚廬其右有白鳥來甘露降觀察使李若初遣官屬驗實會露晞里人失色攢哭曰天所降露禍我耶俄而露復集鳥亦同翔詔作二闕於母墓前又表其閭獨徭役時號闕下林家

陳饒奴

按唐書孝友傳陳饒奴饒州人年十二親併亡寡窮居喪又歲饑或教其分弟妹可全性命饒奴流涕身丐訴相全義刺史李復異之給資儲署其門曰孝友童子

王博武

按唐書孝友傳王博武許州人會昌中侍母至廣州及沙涌口暴風母溺死博武自投於水嶺南節度使盧貞傳吏沈苦獲二屍焉乃葬之表其墓曰孝子墓詔爲刻石

萬敬儒

按唐書孝友傳萬敬儒廬州人三世同居喪親廬墓刺血寫浮屠書斷手二指輒復生州改所居曰成孝鄉廣孝聚大中時表其家

章全益

按唐書孝友傳章全益梓州涪城人少孤爲兄全啓所鞠母病全啓割股膳母而愈及全啓亡全益服斬衰斷手一指以報不畜妻僕處一室賣藥自業世

傳能作黃金居成都四十年號章孝子卒年九十八

楊半

按唐書李甘傳河南人楊半字松年有至行甘方未顯以書薦於尹曰執事之部孝童楊半父茂卿從田氏府趙軍反殺田氏茂卿死半之兄蜀三往索父喪慮死不果至半自洛陽走常山二千里號伏叛壘委髮羸骸有可憐狀讎意感解以尸還之半綬冬月往來太行間凍膚戰寒銜哀雨血行路稠人爲半泣歸責其子以半勉之半爲兄踐操如此未聞執事門言而書顯之豈樹風扶教意邪且鄉人能醫疽剗勝急親之病皆一時決耳猶蒙表其閭脫之徭上有大禮則差問以粟帛今河北驕叛萬師不能攘而半徒步請尸仇手與夫含腐忍瘡者孰多半絕乳即能詩洛陽兒曹壯於半者皆出其下聞半之贖喪路帥償其費其葬也滑帥賻之財斯執事之事他人既纂之矣即有稱半於上者執事能無恨其後乎其激印自任類此半後亦擢進士第

李源

按唐書李愬傳愬十餘子皆遇害唯源彭脫源八歲家覆俘爲奴轉側民間及史朝義敗敗吏識源於洛陽者贖出之歸其宗屬代宗聞授河南府參軍遷司農主簿以父死賊手常悲憤不仕不娶絕酒董惠林佛祠者愬舊墅也源依祠居閨戶日一食祠殿其先寢也每過必趨未始踐階自營墓爲終制時時偃臥延中長慶初年八十矣御史中丞李德裕表薦源曰賈誼稱守圉扞敵之臣死城郭封疆天寶時士卒伏節逆羯始與委符組棄城郭者不爲恥而愬約義同

列守位自如抵刃就終臣節之光由愬始而源天與至孝絕心祿仕五十餘年常守沈默理契深要一辭開析百慮洗然抱此真節棄於清世臣竊爲陛下惜之穆宗下詔曰昔盜起幽陵振蕩河洛贈太尉愬處難居首正色就死兩河聞風再固危壁殊節卓焉到今稱之源有曾參之行巢父之操泊然無營訖此高年夫衷忠所以勸臣節也旌孝所以激人倫也鎮澆浮莫如尚義厚風俗莫如尊老舉是四者大儆於時其以源守諫議大夫賜緋魚袋河南尹遣官敦諭上道帝自遣使者持詔書袍笏即賜又賜絹二百匹源頓首受詔謂使者伏疾年老不堪趨拜即附表謝辭吐哀慙一無受尋卒敬宗時擢愬孫爲河南兵曹參軍

畢構弟相

按唐書畢構傳構字隆擇河南偃師人六歲能爲文及冠擢進士第補金水尉遷九隴主簿居親喪毀棘甚已除猶屏處丘園武后召爲左拾遺神龍初遷中書舍人敬暉等表諸武不宜爲王構當讀表抗聲析句左右皆曉知三思疾之出爲潤州刺史政有惠愛徙衛同陝三州遷益州府長史景龍末召爲左御史大夫會平諸韋治其黨衣冠多坐構詳比重輕皆得其情時李傑爲河南尹與構皆一時選世謂畢李封魏縣男復爲益州長史按察劍南振弊扼私號爲清嚴睿宗嘉構修絜獨行有古人風其治術又爲諸使最乃賜璽書袍帶再遷吏部尚書並遙領益州長史徙廣州都督元宗立授河南尹進戶部尚書久之移疾帝手疏醫方賜之當時以戶部爲凶官遽改太子

詹事冀其愈會卒贈黃門監諡曰景始構喪繼母而二妹穉祿身鞠養至成人妹為構服三年弟栩以太府主簿留司東都聞疾馳歸哀毀如大喪雖變服未嘗笑天下稱其友悌終荊州司馬

殷亮

按唐書殷踐猷傳踐猷少子寅舉宏辭為太子校書出為永寧尉吏侮謾甚寅怒殺之貶澄城丞病且死以母蕭老不忍決及斂其子亮斷指剪髮置棺中自誓事祖母如賓在其後侍蕭疾不脫衣者數年有白燕巢其相後終給事中杭州刺史

李迥秀

按唐書李大亮傳大亮族孫迥秀字茂之及進士第又中英才傑出科調相州參軍事累轉考功員外郎武后愛其材遷鳳閣舍人大足初檢校夏官侍郎仍領選銓汰文武號稱職進同鳳閣鸞臺平章事張易之兄弟貴驕因撓意諸媚士論頓減俄坐貶貶廬州刺史易之誅貶衡州長史中宗即位召授將作少監累遷鴻臚卿修文館學士出朔方道行軍大總管還拜兵部尚書卒年五十贈侍中迥秀少聰悟多通賓客喜飲酒雖多不亂當時稱其風流母少賤妻嘗嘗賈媵婢母聞不樂迥秀即出其妻或問之答曰娶婦要欲事姑苟違顏色何可留武后嘗遣內人候其母或迎置宮中後所居堂產芝草大乳鄰猫中宗以為孝感旌大門閭

李行芳

按唐書義陽王琮傳琮三子行遠行芳行休永昌時行遠行芳斥楊州六道使至行遠先就戮行芳幼當

救抱持請代遂與俱死西南人稱冤悌云

賈會

按唐書賈循傳賈循者京兆華原人其先家常山父會有高節嘗稱疾不答辟署里中號一龍親亡負土成墓廬其左手時松柏時號關中會子卒縣人私諡曰廣孝徵君

陸景融

按唐書陸象先傳陸景融長七尺美姿實寬中而厚外博學工筆札以陰補千牛轉新鄭令政有風績累遷工部尚書東京留守卒贈廣陵郡都督景融於象先後母弟也象先被管景融諫不入則自楚母為損威人多其友四世孫希聲

劉審禮

按唐書劉德威傳德威子審禮審禮少喪母為祖母元所養隋末大亂道不通審禮尚少自鄉里負祖母度江轉側避地及天下平西入長安元每疾病必親煮藥嘗而進元曰兒孝通幽顯吾一顧念疾輒問貞觀中歷左驍衛郎將父喪免比葬徒跣血流行路咨嘆服除當襲爵讓其弟不聽見父執必感泗滂沱事繼母尤謹與弟延璟為聞友得祿多資之而妻子執寒苦晏如也再從皆同居合二百口內外無間言遷工部尚書檢校左衛大將軍儀鳳三年吐蕃寇涼州副中書令李敬元討之遇虜青海上與戰敬元逗撓不前審禮敗為虜執其子尚乘直長殆庶及延璟詣關待罪請入賊以贖有詔審禮徇忠以沒非有罪宜各還職特詔始庶弟易從省之既至而審禮卒易從晝夜哭不止吐蕃哀其志乃還父尸徒跣萬里扶護

以歸見者流涕審禮贈工部尚書諡曰僖

劉敦儒

按唐書劉知幾傳知幾子觀貶子淡亦有學稱生子敦儒家東都母病狂易非答掠人不能安左右皆亡去敦儒日侍疾體常流血母乃能下食敦儒怡然不為痛隱留守韋夏卿表其行詔標闕於閭元和中權德輿復薦之乃授左龍武軍兵曹參軍分司東都在母喪毀瘠幾死時謂劉孝子後為起居郎達禮好古有祖風云

杜羔

按唐書杜兼傳兼從弟羔貞元初及進士第有至性父死河北母更兵亂不知所之羔憂號終日及兼為澤潞判官鞠獄有嫗辨對不凡乃羔母因得奉養而不知父墓區處晝夜哀慟它日舍佛祠觀柱間有文字乃其父臨死記墓所在羔奔往亦有耆老識其塋因是乃得葬元和中為萬年令時許季同為長安令京兆尹元義方責租賦不時繫二縣吏將罪之羔等辯列尤苦尹不為縱羔乃謁宰相請移散官憲宗遣中使問狀具對府政苛細力不堪奉詔皆免官奪尹三月俸議者以羔為直未幾授戶部郎中後歷振武節度使以工部尚書致仕卒贈尚書右僕射諡曰敬

杜式方

按唐書杜佑傳佑子式方字考元以蔭授揚州參軍事再遷太常寺主簿考定音律卿高郢稱之佑既相出為昭應令遷太僕卿子崇尚公主式方以右威輒病不視事穆宗立授柱管觀察使弟從郁痼疾弱為營方藥羞膳及死其而泣世稱其篤行卒贈禮部尚

書從郁元和初爲左補闕崔羣等以宰相子爲嫌再徙祕書丞終駕部員外郎

賈直言

按唐書忠義傳賈直言河朔舊族也史失其地父道冲以藝待詔代宗時坐事賜鳩將死直言給其父曰當謝四方神祇使者少怠輒取鳩代飲迷而路明日毒漬足而出夕乃蘇帝憐之減父死俱流嶺南直言由是辭後署師道府屬及師道不軌提刀負棺入諫曰願前死不見城之破又畫縛載監軍狀而妻子係繫者以獻師道怒囚之劉悟既入釋其禁辟署義成府後徙潞亦隨府遷監軍劉承偕與悟不平陰與慈州刺史張汶謀縛悟送闕下以汶代節度事洩悟以圍承偕殺小使直言遽入責曰司空縱兵脅天子使者是欲効李司空邪它日復爲軍中所指笑悟聞感悔匿承偕於第以免悟每有過必爭故悟能以臣節光明於朝穆宗召爲諫議大夫羣情灑然稱允而悟固留得聽始悟于從諫貴甚見直言輒衣紫擁笏以兵自衛直言諫悟曰郎少年毋使襲山東懲朝服可擅著邪悟死從諫不發喪召大將劉武德等矯悟遺言與鄰道使共表求襲位直言入讓曰父死不哭何顏面見山東義士乎從諫起拜乃居喪軍中遂安

李日知

按唐書李日知傳日知鄭州滎陽人及進士第神龍初爲給事中母老病取急調侍數日鬚髮輒白母未及封而卒方葬吏乃齋贈制日知頌絕於道左右爲泣莫能視巡察使路敬潛欲表其孝使求狀辭不報服除累遷黃門侍郎

宋典貴

按舊唐書孝友劉君良傳宋典貴者雍州萬年人累世同居躬耕致養至典貴已四從矣高祖聞而嘉之武德二年詔曰人稟五常仁義爲重士有百行孝敬爲先自古哲王經邦致治設教垂範皆尚於叔叔世澆訖人多僞薄修身克己事資誘勸朕恭膺靈命撫臨四海愍茲弊俗方思遷導宋典貴立操雍和至情友穆同居合爨累代積年務本力農崇謙履順弘長名教敦勵風俗宜加褒顯以勸將來可表門閭免課役布告天下使明知之典貴卒卒

張公藝

按舊唐書孝友劉君良傳鄆州壽張人張公藝九代同居北齊時東安王高未樂詣宅慰撫旌表焉隋開皇中大使邵陽公梁子恭亦親慰撫重表其門貞觀中特勒吏加旌表麟德中高宗有事泰山路過鄆州親幸其宅問其義由其人請紙筆但書百餘字高宗爲之流涕賜以緡帛

許坦

按舊唐書孝友王君操傳豫州人許坦年十歲餘父入山採藥爲猛獸所噬即號叫以杖擊之獸遂奔走父以得全太宗聞而謂侍臣曰坦雖幼童遂能致命救親至孝自中深可嘉尚授文林郎賜帛五十段

趙弘智

按舊唐書孝友傳趙弘智洛州新安人魏車騎大將軍肅孫父元軌隋陝州刺史弘智早喪母事父以孝聞學通三禮史記漢書隋大業中爲司隸從事武德初大禮卿鄭楚之應詔舉之授管事府主簿又預修

六代史初與祕書丞舍狐德芬齊王文學袁朗等十數人同修藝文類聚轉太子舍人貞觀中累遷黃門侍郎兼弘文館學士以疾出爲萊州刺史弘智事兄弘安全於事父所得俸祿皆送於兄處及兄亡哀毀過禮事寡嫂甚謹撫孤姪以慈愛稱稍遷太子右庶子及官廢坐除名尋起爲光州刺史永徽初累轉陳王師高宗令弘智於百福殿講孝經召中書門下三品及弘文館學士大學儒者並預講筵弘智演暢微言備陳五孝學士等難問相繼弘智酬應如響高宗怡然曰朕頗耽墳籍至於孝經備所習觀然孝之爲德弘益實深故云德教加於百姓刑於四海是知孝道之爲大也顧謂弘智宜略陳此經切要者以輔不逮弘智對曰昔者天子有諍臣七人雖無道不失其天下微臣願愚願以此言奏獻帝甚悅賜綵絹二百匹名馬一匹尋遷國子祭酒仍爲崇賢館學士四年卒年八十二諡曰宣有文集二十卷

崔沔

按舊唐書孝友傳崔沔京兆長安人周隴州刺史士約元孫也自博陵徙關中世爲著姓父體庫部員外郎汝州長史沔淳謹口無二言事親至孝博學有文詞初應制舉對策高第俄被落第者所援則天令所司重試沔所對策又工於前爲天下第一由是大知名再轉陸渾主簿秩滿調遷吏部侍郎岑義深賞重之謂人曰此今之鄭詵也特表薦擢爲左補闕累遷祠部員外郎沔爲人舒緩調於造次當官正色未嘗撓沮睿宗時徵拜中書舍人時沔母老疾在東都沔不忍捨之固請開官以申侍養由是改爲虞部郎中